

光緒丙子清河縣志卷二十

人物三

國朝

王之藩字振元父用時與人不苟含飲酒終日不亂人皆嚴敬之卒官天長教諭之藩材氣豁蕩好讀書旁及天官地理河圖遁甲通其大意順治初授通山令數月民歌誦之當是時天下初定故明遺胄以及四方梟桀不逞託名義而起者往往相望於是蔓延至通山之藩憑城守禦城陷將自殺左右衛止之乃繫其母及家人數十口脇之降之藩詞色不撓眾壯之以見於主帥主

帥歎曰好男子何患不富貴之藩厲聲曰我知忠義不知富貴且爾不自稱義兵乎已託忠義之名而教人以背君棄親爲不忠不孝之人不如死眾知不可奪幽之數日之藩得其馬逃歸軍門聞於 朝其後事志失載不可得而詳云

湯調鼎字右君父曰升邑名諸生也調鼎幼負奇氣文采燁然明末舉於鄉順治初以進士知灋州二年歸絕口不言仕進道韻真素人以爲神仙中人初調鼎受知於路文貞公振飛時明室喪亂天下土崩瓦解而江淮宴如寇欲南略振飛督漕淮上練集義勇防河軍門至

清江浦調鼎率諸生統義勇二萬餘人耀兵於河上先是士大夫猶以戎服爲恥及見軍門至而調鼎諸人皆弓刀結束始各釋儒衣大袒短後袂首人人鼓勇軍門大閱手觴賞賚三日乃畢自甲申三月至於五月寇盜不敢南下路公與調鼎力也及南都擁立振飛被謫明年而江南亡又二年調鼎始成進士去次子濩字昭聖順治中進士仕至晉州知州

吳一清字太一清江浦人順治初舉於鄉天才曠逸讀書過目不忘晚得瞶疾未仕而卒闔若璩常從之游一日問若璩曰五福無貴知其說乎對曰未也一清曰福乃人生受享之物古者有一命卽有一命之責寒者與衣飢者與食不獲其所者與安終身處乎憂患之域其在位如肩其去位如釋豈若後世之貴以位爲恣睢乎一清嘗撰次古文百篇以授若璩能傳其學云

張弼清江浦人父致中字性符崇禎中拔貢生復社初興率同里白受藻方能權諸子應之家故貧而所藏鼎蓋碑版文甚富精小學正體審音著書十餘種晚以經明行修舉未之官卒學者私諡爲恭孝先生弼字力臣通經博古世其家學入 本朝棄諸生服專心六書之學尤嗜金石文字躬歷焦山水澁仰臥沙石手拓座鶴

銘增多前人十餘字入秦謁昭陵徧拓陪葬諸王公墓  
碑及六馬圖贊過濟甯州手拓孔子廟五漢碑皆加辨  
論根據詳洽人以爲董彥遠黃伯思不過也與崑山顧  
炎武友善取鬻產之值爲刻廣韻及音學五書手加校  
讐炎武自序五書後云予纂輯此書三十餘年刊削數  
四又得力臣爲攷說文采玉篇倣字樣酌時宜而手書  
之二子叶箕叶貞分書小字鳩工淮上不遠數千里累  
書往復必歸於是又與潘耒書著述家最不利以未定  
之書傳之於人近日力臣來札五書改正一二百處又  
嘗歎曰篤信好古專精六書吾不如張力臣其畏服如

此五書版刻存淮上李相國光地以五百金購去晚歲  
徧游五嶽皆爲之圖書畫皆名家後嗣衰微其符山堂  
藏書多歸於何焯云弨兄孤弟穀皆知名從子育徽詩

賦敏妙

聖祖南巡召試行在後官宜陽令

山陽縣志  
官中部知

縣

何澗字海若豪爽有略幼讀書習科舉快快不快讀孫  
子兵法大喜之遂精騎射順治中以武科進士起家授  
浦城守備海寇爲亂調防同安時沿海諸城戒嚴澗在  
危置中身不解甲者三月民賴以安嘗巡視大輪山羣  
峯環錯奇詭萬狀乃設伏爲疑兵外未靜鎮寇不敢犯

偏裨中推爲名將在同安二年以勞致疾卒於官從子  
可及字岸先邑諸生先是瀾官浦城時隸故提督馬侯  
戲下侯歿於王事嗣侯傳檄四方募其父時故諸將子  
弟共滅賊可及走軍前累見擢用選銳直前連戰皆捷  
康熙中授潮州揭陽鎮守備可及在潮州凡數年靖餘  
寇安反側未幾卒子二述言述字行與邑諸生讀書不  
務進取好吟詠言字行生郡諸生侍可及於嶺南父卒  
幾毀奉母以孝聞旣歸立行義於鄉振貧焚券不以告  
人時稱長者

王文福字慶輔知書有將略嘗以守備從征浙閩解漳

光緒丙子清河縣志

卷二十

四

州興化之圍總制李之芳尤器之時有故僞揚烈將軍  
程鳳妻王玉貞者握重兵統據諸要害爲患攻之莫能  
下文福單騎往撫陳說 朝廷威德玉貞感泣率全旅  
歸誠東南屏息功最累遷嘉興營副總兵在鎮數十年  
大小五十餘戰未嘗剗衄其威望尤在二何將軍之右  
年六十一卒於官封驍騎將軍子鳳翽太學生兄弟析  
居止取圖書數卷不問田舍嘗有戚某病危密畀萬金  
以孤幼爲託鳳翽撫之成立舉而歸之封識宛然  
陳伯壘字子韶父世美邑明經以謹厚見稱於時伯壘  
生而慧美風儀可觀順治初以拔貢起家長治令是時

章皇帝以英年開太平尤畱心吏治引見伯堦於  
乾清宮 論以潔已愛民爲務長治大邑民富而淳伯  
堦治之以靜與吏民相安無復明季之煩擾矣長治民  
皆愛之會以疾告不許每力疾視事歎曰不能朝攷職  
夕序業與民相親是尸位也力請而歸弟伯堅字子貞  
童時卽有利人之志康熙初以明經入對授布政司理  
問不就先是邑中里差爲累積十年無敢發者伯堅歷  
牒諸大吏必得請而後已 王師道清口需夫萬計邑  
不能辦吏民皆恐伯堅傾家助募其他脫逋戶解枉訟  
助昏葬瞻窮旅拯覆溺終無德色老而益恭子二鉞鉞

鉞字公鼎值歲大侵糶米振饑一如伯堅所爲邑令喻  
之遲絀誤病卒親紀其喪喪得歸鉞字公鼎以孝友聞  
鉞一子仁灝鉞嘗以牽連抵罪仁灝願以身代不許則  
常寢於外曰父居危苦敢逸樂耶仁灝早卒鉞繼歿孤  
孫未成立鉞撫育倍至焉

吳鉅字任斯璜之孫居廣之子也讀書一過輒了了下  
筆不休當明之季世江右章世純一見其文深相款結  
時毗陵孫文介公愼行倡明絕學與語大器之延館止  
躬齋中講論心易家近市足不越戶限康熙中以恩貢  
例授州同知改教職更號遜庵

一作  
約庵

以見志里有爭者

未嘗不恥過其門焉年七十三卒子湛泓瀚湛字醴泉  
肄業太學見知於大司成王士正湛應鄉試者二十有  
二年九十五乃卒泓字德源游 京師受業於張相國  
玉書與劉巖汪份友善自大宗伯許汝霖少司空彭會  
淇以下爭敬禮之以教習期滿攷授知縣方治裝入都  
而卒瀚字碧海諸兄皆貢 京師瀚獨力行義卹於鄉  
里所居漁溝鎮地下瘠貧子弟失學瀚請於邑令管鉅  
創義塾置膏火今所謂臨川書院者也族屬旣繁死亡  
丁糧累及見戶瀚置宗田三百畝輸納以紓眾困瀚文  
譽不及父兄而德器甚茂疾篤時里中有祈以身代者

汎卒自來集於門爲之守望聞其卒也號泣同聲子擎  
柱字鰲六附貢生幼失怙撫諸弟成立同居百口無閒  
言弟擎楹字季閑增貢生負文章名數十年性剛而不  
鑿於俗兄弟皆好施與周恤如瀚時焉擎楹疾革遺言  
無信浮屠設齋醮不及其他鉅宗人鏹邑庠生遇事慨  
慷不侵然諾子洵力學工爲文洵從弟淳先後貢成均  
洵之歿也以孤子託淳始終教之成立淳選邳州學正  
未之官卒

陸騰駿字馭之沈毅有智略出於孤貧而氣自英舉順  
治初以貢士授懷柔令攝密雲廉幹而威時 國家新

定中原而懷密皆畿輔赤緊騰駿下車清豪右侵占民田斷久繫疑獄代完密雲逋穀千三百石豁重編四百六十餘丁吏聲大振遷西城兵馬指揮二年擢戶部河南司主事監鑄督關慨然有曼容之願長假歸築室西園優游以終子坦攷授縣丞以孝義著稱尤工爲文文甚富又有陸閔中者攷授訓導加授縣丞晚倦仕進隱於西園處豐能儉望而知爲有道者焉

張鴻圖字會公康熙中由教習授臨潁令性廉明不爲勢利所屈於時西方用兵徵調孔急鴻圖不乏軍興而里不知擾後乞休民留之不得則立生祠以祀之同時

光緒丙子清河縣志

卷二十

七

又有譚述楊穆述字彭若才調流贍以諸生入對 取第一人授 內廷教習攷滿任侯官令以憂歸再起知臨城在二境皆以清勤流聲穆字西牧以中書通判歸德才氣過人治水聽訟聲績甚著善爲詩與孫執升友善其後有榮澤丞陸命新亦以才略稱

丁象咸字志諧康熙初官蕪湖教諭學邃行優尤熟於涑水司馬氏之學問以古人世系爵里應答如流莫能窮之子兆蘧字知非世其家學爲來安訓導有聲乾隆初修府志兆蘧編葺之功爲多弟恕字勿齋亦以孝友稱自餘爲校官者有周康晉周謨汪元運力克銳康晉

字錫三蕪湖訓導也爲人嚴毅勤考課與其地之大吏情好往來而不干以私謨字公著寶應訓導不苟言笑或以修飾殿宇爲名懷百金投之謨怒曰此吾所不屑而聖人願之乎去不顧元運字應五官荆溪訓導嚴立課程抑遏奔競有新進懷金夜謁元運笑曰子乃污我將歸念學宮圯謀新之而病尋篤扶牀告妻子質衣物以竟其事卒之日士哭於庭民歎於市祀之尊經閣上克銳字利犀江浦教諭性疎懶厭人事而課士甚勤以憂歸卒

劉斌字璞生少有盛名順治十年以選貢於 朝際

國初需才同輩王之藩陳伯壘陸騰駿皆以貴顯矣斌獨以親老不赴父嘗病篤斌願以身代而病果痊家素饒裕振貧焚券無歲無之晚年屢檄不起家事謝之諸子飭勿復關白與遺民耆舊出游遇佳風景或竟日忘歸年六十九卒子震坤震字繹純官建平教諭好興作供祭器設樂舞清學田嘗曰古人隨地建功吾敢以學官爲卑冷哉坤字繹麟廩貢生性軒爽任俠絕意仕進往來西泠泛舟賦詠一時名士多折節盡禮爲詩力追沈宋所著甚多皆行世子晉邑諸生以孝聞其趨人之急有祖父之風

湯日進性至孝童時曾剝股及肝以活母已而大困其師廉知之爲請旌於學使者順治中以歲貢官泰州學正時以至孝稱者復有王孝劉永欽孝父國幹與弟國勳同居孝之事國勳如父於是孝年十三歲矣國勳病劇孝侍左右泣下剝股肉而進病良已康熙七年知縣周世璉旌焉孝時尚未有名旌不可無名周侯曰名之以孝至今稱王孝云永欽庠生弱冠時父病危願以身代旣割股以進創裂殆絕復蘇而父亦愈

萬鎮庠生父病衣不解帶數月父歿哀毀骨立事慈母事必稟命而行年踰六十未嘗自擅也母喜施予曲意承之及疾甚日夜號泣以奉母之不終易簣時猶呼母不絕口人謂之死孝

漆純庠生事繼母如母繼母歿與弱弟友愛而其父老矣有錮疾純扶掖左右妻歿遂不再娶而與父同宿者三十有七年

王謹身字省庵庠生四歲失父奉母至孝母卒終身敝衣蔬食有酒肉必祭祭且泣或母生辰及忌日拜哭終日不忍食年八十如一日時復有張庶周誥萬一驤皆以孝聞庶九歲失父擗踊長號或廢寢食事孀母曲得其歡心誥庠生自童子時能先意承志父性嚴肅誥不

衣冠不見親歿飲食必祭儼如也尤篤於兄弟每食有一人後至輒不食一驤庠生兄弟四人析產以腴相讓而自取其瘠里人與兄構怨率眾毆之一驤往解弗獲則以身代承傷焉不起者累月里人悔服一驤弗校也又有汪元鼎者庠生遇弟難破家以身代執於官而無怨言邑令管鉅憐而釋之延爲義學師

孫嘉玉康熙中舉武科頗涉經史輕財好施歲終徧訪不足者助以粟帛歲荒代納里中丁糧以爲常子鉦立義不欺然諾邑有公事必推孫氏父子鉦以是與當道交尊酒而已鉦居母喪以毀聞兄弟分財讓而取惡鉦

嘗以歲貢攷授縣丞不樂往以母故也時邑有大事能任之者又有張心範周肇歧心範多造就邑中貧子弟肇歧修學宮興水利功居多又有俞魁煥魁煥弟星煥皆恂恂然郵讓君子也

汪元度以文學著稱其爲文不假思索竝興而就尤長於詩自淮徐十七學之士未有先之者初邑令許眞吾以詩名嶺南旣下車尤愛元度之作以爲有晉人風元度歿時眞吾已去官比復至絮酒往弔求其詩裁得百餘篇讀而歎曰永嘉正始亦復去人何遠元度字晉裴康熙中歲貢生同時又有周訥廩生湯如漪歲貢生周

宜恩貢生訥天資高秀而恬靖和雅多內行如漪聰強  
富瞻力學不倦後進多從之游從游至徧邑中矣宜尤  
攻苦潛心五十餘年三人者名相埒也又有范宗顏文  
學旣茂而至性孝友宗族無閒言宗顏亦歲貢生  
何漢字廣矣不拘繩墨聰慧絕人讀書日萬言爲文奇  
矯有氣累試不第漢自以其狂不可及晚益放蹟一時  
吳楚俊人無不投分定交所許者則終身一日年七十  
四將終以詩徧別友人言笑自若

沈樹本字孝先少清介遇事不苟同雍正初由教習歷  
攝雲夢穀城光化三縣事而在穀城最久樹本善治疑

獄穀城人使酒不相下暮歸殺諸塗急捕不獲役懼給  
一優人使之承獄具樹本姑頌繫而更令他設置酒召  
優酒酣而謂之曰何苦爲此優涕下謂我何敢殺人殺  
人時我在南漳李宅役給我謂終脫我言已大哭樹本  
逮李與質卒正其獄攝均州州有武當山宮觀迤邐道  
士百許財力傾一州挾持長吏樹本下車皆來謁問北  
極何神對曰神甚靈異必多設醮祭不則束縛人樹本  
笑曰若然一錢神耳叱之退竟樹本在職莫不斂蹟尋  
絳誤去再起攝京山鍾祥鍾祥稱難治有何元者家巨  
富被枉殺人更數令三年無定讞株連多多至四十餘

人樹本一鞠得情四十餘人皆得申樹本再至楚而名益著大吏知其能歷知蒲圻潛山湘陰湘陰有訟山田者屬城守官懷金求直樹本偽受而屬勿言明日坐堂皇召賄金者曰若不聞漢楊太尉乎我故不及然奈何污我金在是左右皆大驚無不惴恐是時長沙屬邑有漕解費數千金革而未果諸令爭先取或告樹本奈何矯廉樹本笑曰此金不過愚子孫召災禍而已其後大府果上言諸令皆得罪人益高之樹本性狷急每至一縣輒大書堂壁愛民如子疾客若仇客以是多怨樹本樹本陽不爲意然喜獎士至分俸金助諸生貧者意所

不可託屬並絕卒以清介見抑於時年六十一解官歸卒於家

王永熙字映庚拔貢生由宗人府教習授香山令調龍川高要操行清介嘗曰未有官不廉而惠澤及人者高要古端州地硯材重天下時奉檄開坑有同官以千金估其羨弗應以事去官餘硯數匣而已晚居郡城布衣葛屨以書自娛工詩淘鍊精壯書近褚河南深自貴重學者稱爲小史先生